

Bunamein in quen ulivau

La Spital regional Surselva SA ha salvau sia radunonza generala

■ (anr/ac) Bunamein ha la Spital regional Surselva SA pudiu presentar in quen ulivau a caschun da sia radunonza generala dil vendergis vargau a Glion. Igl onn 2016 ei staus signaus da diversas midadas enteifer la gestiun ed il tgamun medicinal dil Spital regional Surselva a Glion. Igl onn 2016 ha il president dil cussegl d'administraziun dalla Spital regional Surselva SA, *Mathias Bundi*, valetau sco onn da partenza en ina nova fasa. Diversas midadas enteifer la gestiun sco era al tgamun medicinal dil spital han fatschentau il cussegl d'administraziun e la gestiun egl onn vargau. La tscherca da niev persunal medicinal e da tgira ha Bundi valetau sco gronda sfida. La situaziun geografica dil spital regional carmala buc exnum per surpender ina incarica e niev persunal ei tschercaus dapertut. Ton pli satisfats ei Bundi ch'igl ei reussiu da remplazzar las plazzas vacantas al tgamun dalla chirurgia e medischina cun *Marcel Bundi* e *Thomas Koch* che surpandan lur nova incarica proximamein. Gia surpriu sia nova incumbensa ha *Marcus Caduff* sco niev meinafatschenta. A caschun dalla radunonza generala dil vendergis vargau ha ei dau ina ulteriura midada enteifer il cussegl d'administraziun. Da niev representa *Walter Bär* sper *Heidi Werner* il spital cantunal en il cussegl d'administraziun. El remplazza *Heinz Bereiter* che ha demissionau. Malgrad ina digren da 182 cass staziunars el decuors digl onn vargau eis ei reussiu alla Spital regional SA da bunamein presentar in quen ulivau, sco il tgamun dil spital scriva en ina comunicaziun. Il menaschi siara cun in deficit da 164 000



Igl onn 2016 ha portau diversas midadas personalas al Spital regional Surselva a Glion.

francs. La digren dils cass staziunars attribuescha il spital regional a pli paucs accidents da skis e cass urgents aschia ch'il recav ei sereducius per bunamein in milliun francs, en paregl cugl onn precedent, sin 29,31 milliuns francs. Visavi stattan expensas da 28,43 milliuns francs. Il deficit attribuescha la gestiun dil spital per gronda part al menaschi dalla centrala dil clom d'urgenza 144. Investau ha il spital igl onn var-

gau 2,58 milliuns francs e quei en ina secunda etapa da renovar las combras dils pazients, indrezs tecnicos e dad informatica. En in engrondiment dil baghetg secasa en cuort la partiziun da parturir.

Sedrizzar als basegns regionals e turistics

La purschida dil spital regional a Glion sto sedrizzar als basegns dalla regiun

sco dil turissem e tener quen al svilup demographic. Quei scriva il tgamun dil cussegl d'administraziun en siu rapport annual. Tener il persunal da tgira e medicinal a liunga vosta el menaschi valetescha Bundi per impurtont per mantener la stabilitad dil menaschi anened anoviers ed ademplir l'incarica da prestaziun. In mandat da prestaziun selai rinforzar entras la collaboraziun cun il spital cantunal a Cuera. Il rapport

menziuna ina collaboraziun che garanteschi da porscher in provediment dad aulta qualitat e cun ina quantitat sufficienta. Il tgamun dil cussegl d'administraziun valetescha quella collaboraziun per existenziala per il Spital regional Surselva. Semussaus seigi quei fatg durent la tscherca da caumiedis entras il sustegn ella fasa nua che quellaz plazzas ein per part stadas vacantas. Grazia allas soluziuns transitoricas cun divers specialists mess a disposiziun dil spital cantunal ha il spital regional pudiu porscher il survetsch medicinal necessari. Il rapport annual porscha investa ella lavur dallas diversas partiziuns dil spital. Aschia plidenta il caumiedi parent dalla partiziun dalla medischina, *Ueli Zellweger*, il svilup da sia partiziun enteifer ils 25 onns vargai. Avon in quart tschentaner ha el entschiet sia incumbensa al spital regional a Glion e sia partiziun ha tgirau en quei emprem onn 1839 pazients. Il diember ei sedublegiaus ed ha contonschiu igl onn vargau 3660 pazients.

In onn difficil per la centrala dil clom d'urgenza

La menadra ad interim dalla centrala dil clom d'urgenza 144, *Sabine Weiss*, ha valetau en siu rapport igl onn 2016 per il pli grev onn da quella instituziun. Ella scriva ch'il menaschi dil clom d'urgenza 144 seigi staus garantius sulet grazia ad in engaschi supplementar dad emploiad ed emploiai cun sustegn dil spital e digl Uffeci da sanadad dil cantun Grischun. El decuors digl onn 2017 vegn la centrala dil clom d'urgenza dislocada da Glion a Cuera ed integrada ella centrala dalla polizia cantunala.

Liug da sentupada en uustria da parada

Morissen ha inaugurau la sonda l'ustria «Il Mulin»

■ (anr/gv) Dapi entgins onns ha Morissen negina uustria dil vitg. Quei han Marcus ed Ueli Caduff vuliu midar. Avon quater onns han els giu la finamira da realisar ell'anteriura casa communal namiez il vitg in liug da sentupada. La suprastonza communal da Lumnezia ha susteniu quell'idea ed igl architect *Patrick Rothmund* da Trun ha examinau la realisabladad. Beinspert han ils iniziants constatau ch'il liug ei buc ideals per lur intent. All'entrada dil vitg han ils dus umens iniziats anflau in object in bionton pli attractiv. Il mulin construius 1945 era renovaus avon paucs onns, denton aunc buc il magnet giavischau. Culla midada dil mulin en in menaschi gastronomic han Marcus ed Ueli Caduff realisau a Morissen ina uustria da parada che ha tuttas premissas da daverntar in magnet en Lumnezia.

Ina sala generosa

La midada dil mulin en ina uustria ha pretendiu digl architect *Patrick Rothmund* tut inschign. Siu inschign ha tunschiu d'entusiasmar ils dus iniziants. Quei ha Marcus Caduff constatau a caschun d'ina guida tras las localitads. El ei il president dil cussegl d'administraziun dalla societad anonima «Il Mulin». Per mantener la structura dil baghetg endadens ha igl architect schau isolar quel ordadora e curclar el cun ina fatschada da lattas en stegin. Il sulegl vegn a procurar en cuort per la tempru giavischada.

Endadens ha Rothmund creau in bischu. La stiva dil muliner ei transformada en ina sala che selai veser. Il tetg ha el schau isolar endadens, ha denton buca vuliu zuppar tutta structura veglia. Quei ei stau ina sfida extraordinaria. Cun in plantschium artg alv ha el pronunziu la structura veglia e

dau alla sala tempru extraordinaria. Enamiez il plantschium ha igl architect schau installar ina platta da glas. Ils hospis han vosta el mulin ina alzada sut. «La sera vegn il mulin illuminaus, quei dat ina atmosfera tut aparti», ha Marcus Caduff commentau.

In milliun

La midada dil mulin en in menaschi gastronomic ha custau strusch in milliun francs. La vischnaunca ha investau in quart milliun ella structura dil baghetg ch'ei en siu possess, la societad acziunara ha finanziau il menaschi gastronomic. En

ina part construida da niev ein las installaziuns tecnicas piazzadas e sin quei baghetg ei ina terrassa viers sid. La societad dumbra rodund 180 commembers che han contribuui ina summa da bunamein 300 000 francs. 150 000 francs ha la vischnaunca da padrinadi Unterengstringen contribuui ed igl Agid svizzer per la muntogna ha medemamein schau perschuer dalla necessitad d'in tal project.

Magnifics capuns al mulin

Anita e Michele Michelucci ein ils affittaders dil «Mulin» a Morissen. L'ustiera ei

cuschiniera da professiun e sco ella ha sincerau han ils dus gastronoms surpriu il niev menaschi cun tutta pissiun. «Il Mulin» a Morissen vegn enqualin a visitar per meraviglias. Sche quels hospis tuornien el mulin, hai jeu vuliu saver d'Anita Michelucci. «Segir», ha ella detg senza studegiar ditg. In sguard ella carta lai sminar ch'ella savess haver rashun: «Pasta da bizochels cun carn secca e larva frestga, enzugliada en urteis gratinai cun caschiel da muntogna». La cuschiniera numna ses capuns «magnifics».



Marcus ed Ueli Caduff (dretg e seniester) ein ils iniziants dil project «Il Mulin» a Morissen. Patrick Rothmund (secund da seniester) ha planisau la midada dil mulin en in menaschi gastronomic ed Anita Michelucci ei l'affittadra dil menaschi.

80 piazzas per praschun nova a Cazas

■ (rtr) L'Uffizi per l'execuziun giudiziala dal Grischun ha publictà ina broschura cun tut las piazzas ch'i vegn a dar en il stabiliment giudizial serra Realta en circa trais onns. Interessents pon s'annunziar gia uss. Actualmain lavuran circa 30 persunas en il Sennhof a Cuera. En la nova praschun a Cazas, che vegn averta la fin dal 2019 u l'entschatta dal 2020, dovra quai passa 110 persunas. Sco quai che *Mathias Fässler*, il director da l'uffizi per l'execuziun giudiziala, ha ditg saja quai ina gronda sfida d'occupar tuttas piazzas. Ils resuns dal persunal actual al Sennhof sajan fitg positivs, tuts hajan ditg d'era vulair lavurar en il nov lieu a Cazas.

Entradas bainvegnidas per las scolas

■ (rtr) En Surselva rimnan oravant tut las scolas il palpieri e per part era chartun. Quai porta intgins daners en cassa. La Regiun Surselva sustegn la rimnada da palpieri e chartun cun indemnizar quellaz. I saja ina sort contribuziun da solidaritad, declera *Duri Blumenthal*, il mainagestiu da la Regiun Surselva. Las scolas n'hajan betg simpel da vegnir tar daners ed uschia possia la Regiun Surselva gidar in pau. L'onn passà è uschia vegnì pajà a las scolas u vischnancas var 220 000 francs per il palpieri e chartun rimnà. Entant che la Regiun Surselva paja tranter 11 e 16 raps per kg survegn ella sin il martgà be 3 fin 5 raps per kg. Ma tuttina sa paja quai. Sco Blumenthal di saja quai er in patratg economic. Pertge sch'il palpieri ed il chartun vegnissan dismiss sco rument ordinari custass quai dapli per la dismesa. Er a Trun e Sumvitg rimnan las scolas palpieri e chartun. Entras quai survegnan ellas tranter 500 e 1000 francs, di *Armon Bearth*.